

[fol. 185v]

## *Außgab auf Gepey vnd Vnderhaltung beeder Preuheuser*

Wie in fertiger 1686ig-iehriger Preurech.  
*fol.* 216 zu sehen, ist zwar wegen des ganz  
verfaulten hohen Gepilckhs im vordern alten  
Preuhaus zur Churfürstlichen hochlob. Hof Cammer  
Minchen schon vnderm *dato* 12. Jener A<sup>o</sup> 1687  
ein vnderthenigster Bericht sambt zwayen  
Yberschlögen von dem alhiesigen Stattzimmer-  
vnnnd Mauermaister wegen wider neuer  
Verfertigung dessen eingesendt worden,  
waryber aber hiebeikhommende erstere genedigiste

*Litt. M* *Resolution sub dato* 23. *Juny* A<sup>o</sup> 1688  
*per* 2154 fl. 45 kr. eruolgt. Nach-  
deme sich aber wegen des *continuirlich*  
aufsteigenden starckhen Dampfs von beeden  
Preupfannen vermög des von dero Hof-  
Paumaistern *Antonj Viscardi*<sup>111</sup> alhir daryber  
eingonnenen Augenscheins der Paufahl  
bey disem hohen Gepilckhs wegen Ermangelung

[fol. 186r]

obangeregt genedigister *Resolution* vmb ein  
mörkhliches vermehret. Als ist dis-  
fahls yber vorigen noch ein verrerer vnderthenigster  
Bericht vnderm *dato* 12. *Augusty* A<sup>o</sup> 1688  
sambt zwayen des Stattzimmer- vnnnd  
Mauermaisters verfassten weitem Yberschlögen,  
beede lesstere vf 439 fl. 42 kr. lauttent,  
eingesendt worden, warauf hiebeigebogne  
genedigiste Bewilligung vmb erstbemelte Summa

*Litt. N* der 4369 fl. 42 kr. *sub dato* 17. *Augusty*  
*Anno* 1688 ebenfahls ergangen. Als das  
sich obbesagte beede Anschaffungen in allem  
vf 2594 fl. 27 kr. belauften, waruon  
<sup>112</sup>nachsag der fertigen 1686ig-iehrigen Preurechnung  
*fol.* 216 zr. in dessen in dem Churfürstlichen Gehilz  
Hienberg 14 lange Palckhen vnd 8 grosse Durchzig  
zue dem hohen Gepilckh abgehauet, gerauchwerchet  
vnnnd desswegen an erstangezognen *fol.* 29 fl. aus-  
gelegt worden, also das zue Fortsetzung solch khonfftigen  
Paus annoch 2565 fl. 27 kr. Rest verbliben,

<sup>111</sup> Sh. zum ihm HA 1685-1687/88, *Der bayerische Hofbaumeister und das Weisse Brauhaus*.

<sup>112</sup> Randbemerkung am linken Rand: „Genedigist bewilliget / 2594 fl. 27 kr. / Ist verpaut / 29 fl. fol. 216 zr. / Resstirn noch / 2565 fl. 27 kr.“.